

# Parlament refusa scumond da reclama per tubac

Era la chombra gronda renviescha la lescha

■ (sda/anr/vi) Il minister da sanadad Alain Berset survegn chanaster: Il parlament renviescha la lescha da tubac al cussegl federal. Er il cussegl naziunal n'ha vuli savair nagut ier d'in scumond da reclama. La martganzia libra saja pli impurtanta che la prevenziun. Cun 101 tar 75 vuschs e 14 abstenziuns suonda la chombra gronda il cussegl dals chantuns che aveva renvià la lescha gia la stad passada. Ina maiortad, furmada da la pps, pld e pcd, ha fatg sballunar la fashenta.

La cumissiun da sanadad dal cussegl naziunal aveva anc pledà persuenter da discutir la lescha e far tschertas modificaziuns. Quai fiss era stà il giavisch da Berset. Ma mo l'ala sanestra, la pbd ed ils verd-liberals han dà suatientscha al cussegl federal. Uss sto il cussegl federal anc ina giada reponderar la chaussa.

## Evitar misterlotims

Cun la lescha davart products da tubac less la regenza mitigiar problems da dependenza. Il parlament pretenda dentant ina lescha che cuntegna mo elements nuncontestads sco per exempel la protezzion d'uffants u da giuvenils.

Da restricziuns da reclama en il kino u sin parais da placats u da scumonds da sponsoring na lessan las duas chombras federalas savair nagut. I saja cunzunt era da desister d'ina decleraziun davart expensas da reclama e da marketing. L'ala burgaisa ha avertì da gea betg «attatgar la



Reclama da tubac resta scumandada. MAD

martganzia libra». I na saja betg cumprovà che scumonds generals da reclama fetschian ch'i vegnia fimà damain. Bruno Pezzatti (pld/ZG) ha discurrì d'in misterlotim cun personas creschidas.

## Discutar empè da spustar

Plinavant survegness il cussegl federal ina pussanza memia gronda. Betg chapibel saja era pertge ch'i duess valair per il tubac da bucca snus u per ina cigaretta electronica cun nicotin las medemas reglas sco per cigarettas ordinarias pli nuschaiavas.

«La lescha proponida è stravagada, vana ed intervenziunistica», ha concludì Raymond Clottu (pps/NE). Ils creschids sajan sezs responsabels per l'atgna sanadad.